

LISTOVI

GRAČANIČKI GLASNIK
časopis za kulturnu
historiju

Broj 41, godina XXI
maj, 2016. [str. 169-181]

© Monos 2016

Listovi Gračaničkog kalendara od 4. 11. 2015. – do 6. 5. 2016.

Dr. sc. Omer Hamzić

4. 11. 2015.

**Gračanička kompanija “Kovan” dobitnik još
jednog priznanja za kvalitet svojih proizvoda**

Ovog puta priznanje dolazi sa Sajma Renexpo, koji je Saidu Karaliću, osnivaču kompanije dodijelio nagradu za uspjeh u energetske efikasnosti kompanije, odnosno za uspjeh proizvoda brenda “Ekoline”. Karalić je za medije kazao da je “Kovan” ušao u Evropu kao pionir u proizvodnji kotlova na pelet, a danas je već lider u Bosni i Hercegovini i susjedstvu. Bosna i Hercegovina danas troši više peleta nego sve zemlje bivše Jugoslavije zajedno, a preko 90 posto tih proizvoda je iz “Kovana”, istakao je vlasnik ove firme. “Kovan” je poznat širom Evropske Unije, te su rijetke zemlje u koje njegovi proizvodi nisu stigli. Inače, ova je firma posao započela prije petnaestak godina sa svega dva uposlena radnika, dok ih danas broji 190, od čega je oko 40 visokoobrazovanih.

8. 11. 2015.

**Premينو ugledni gračanički privrednik
Hajrudin Fišić Fišo**

Bio je osnivač i vlasnik prosperitetne firme “Tehna”, koja se specijalizirala za proizvodnju betonskih konstrukcija, posebno stubova za potrebe elektro-privrede, postavši jedan od lidera na tržištu. Iznenadna smrt zatekla ga je u 53. godini života. Ukopan je 9. 11. 2014. u rodnom Sokolu, u mjesnom greblju Ilidža.

LISTOVI

11. 11. 2015. Novi asfalt u Lukavici



(foto: bkc-gracanica.ba)

Radi se o dionici puta, dužine 835 metara kroz mahalalu Prnjavor, koja je bila blokirana nekoliko mjeseci zbog prošlogodišnjih elementarnih nepogoda. Vrijednost projekta iznosila je oko 250.000 KM, a zajednički investitori su Federalno ministarstvo vodoprivrede, Evropska investiciona banka i Općina Gračanica. Presijecanjem vrpce i uz skromnu svečanost, ovu saobraćajnicu otvorili su načelnik općine Nusret Helić i predsjedavajući Vijeća mjesne zajednice Lukavica Almedin Devedžić. Tom prilikom je istaknuto i da je teško prohodni put Lukavica – Malešići, nekadašnja jedina veza Lukavice sa svijetom, ušao u plan Direkcije za puteve TK., pa se na njemu uskoro očekuju obimni sanacioni radovi.

12. 11. 2015. Ambasador Rumunije posjetio Kompaniju “Širbegović”



Ambasador Rumunije u Bosni i Hercegovini Filip Teodorescu u okviru posjete općini Gračanica posjetio je i prostorije kompanije Širbegović, a sastanku su prisustvovali ministar razvoja i poduzetništva TK Nermin Hodžić i ministar prostornog uređenja Hasan Ferhatović. Vlasnik kompanije Faruk Širbegović je goste upoznao sa trenutnim i budućim planovima u proizvodnji betonskih konstrukcija, te aspektima društveno odgovornog poslovanja kompanije. Ambasador Teodorescu je istakao kako je uspjeh kompanije Širbegović pokazatelj da je uz veliko zalaganje i kontinuiran rad moguće uspješno poslovati u BiH, te da Širbegović predstavlja jedan od najsvidljivijih primjera uspješno realizovane poduzetničke priče.

24. 11. 2015. Obilježavanje 25. novembra – Dana državnosti BiH u Gračanici...

Centralna proslava Dana državnosti BiH za Tuzlanski kanton ove je godine organizirana u Gračanici, od strane SABNOR-a TK, UABNOR-a Gračanica i Općine Gračanica. Program obilježavanja je započeo 23. 11. 2015. godine na pravoslavnom groblju u Varoši, otkrivanjem nadgrobne spomen-ploče Stojanu Maksimoviću, nosiocu “Partizanske spomenice 1941.”, istaknutom društveno-političkom radniku i jednome od osnivača Srpskog građanskog vijeća u Gračanici. Narednog dana uslijedio je obilazak i polaganje cvijeća na Spomen-kosturnicu borcima NOR-a i bistu J. B. Tita te Centralno spomen-obilježje Odborbeno-oslobodilačkog rata 1992.-1995. Nakon polaganja cvijeća, u foajeu BKC-a je otvorena tematska izložba “Antifašizmom za državu Bosnu i Hercegovinu”, autora Edina Šakovića; izložbu je otvorio Osman Puškar, ratni komandant Gračanice i član glavnog odbora SABNOR-a BiH. Potom je u velikoj sali BKC-a uslijedila svečana akademija sa kulturno-umjetničkim programom. U ime Vlade TK prisutnima se najprije

obratio premijer Bego Gutić, nakon čega je o značaju ovog datuma i njegovim vrijednostima govorio općinski načelnik Nusret Helić.

26. 11. 2015.

Gračaničko zdravstvo domaćin simpozija Međunarodne asocijacije za dnevnu hirurgiju (IAAS)

Riječ je o međunarodnom naučnom skupu iz oblasti dnevne hirurgije koji se prvi puta održava u BiH. Osim uglednih predavača iz Mađarske, Holandije i Danske, na skupu su aktivno učešće uzeli i medicinski stručnjaci iz cijele BiH, među kojima i domaćini iz gračaničkih zdravstvenih ustanova, koji su iznijeli svoja iskustva u tom području medicine. Inače, na Hirurškom odjelu Opće bolnice u Gračanici ponovo se rade endoskopske operacije, čime se uz manju traumu i estetske efekte omogućava se brži postoperativni opravak pacijenta i povratak svakodnevnim aktivnostima, a planirana je i nabavka opreme nepohodne za uvođenje novih laparoskopskih operativnih zahvata.

27. 11. 2015.

“Klaus Lehmann” Gračanica – partner sa firmom Siemens



(foto: bkc-gracanica.ba)

To je ozvaničeno potpisivanjem partnerskog sporazuma u sjedištu gračaničke firme Klaus Lehmann, koja je postala jedan od lidera u BiH kada je u pitanju pružanje usluga u oblasti elektronike i elektrotehnike, elektromontažnih radova kao i audio i

video opreme. Potpisivanjem partnerskog ugovora sa Siemensom kao svjetski poznatim brendom na ovom području, koji se odnosi na proizvodnju postrojenja SIVACON S8, Klaus Lehman će u narednom periodu proizvoditi elektro opremu brenda Seimens sa kojom bi firma trebala da zauzme vodeće mjesto na tržištu u BiH, a velike ambicije se polažu i na osvajanje regionalnog tržišta. Konkretno, potpisivanje ugovora značit će puno i za našu lokalnu zajednicu jer u perspektivi je najavljeno proširenje kapaciteta firme a samim time i nova zapošljavanja. Ugovor su potpisali u ime firme Klaus Lehmann, direktor Kemal Hamzić, a u ime Siemens partneri i predstavnici firme, Sadudin Ganić i Günter Berndt.

30. 11. 2015

Održana 36. sjednica Općinskog vijeća: na dnevnom redu plaće uposlenika općine i upravljanje parking prostorima

Odluka o utvrđivanju platnih razreda i koeficijentata za plaće uposlenika Općine Gračanica nakon duže i na momente burne diskusije vraćena je predlagraču na doradu, a zatim se povela rasprava o Izvještaju o provođenju Odluke o javnim parkiralištima na području općine Gračanica sa programom upravljanja parking prostorima za period do 2020. godine. Vijećnicima se najprije obratio direktor preduzeća “ORVI-Comerc” Refik Alić, upoznavši ih sa radom ove firme koja trenutno upravlja parking prostorom u Gračanici; radi se, inače, o preduzeću koje je registrovala Organizacija Ratnih vojnih invalida. Nakon izlaganja, uslijedila je rasprava u kojoj su svi vijećnici dali podršku firmi ORVI-Comerc za upravljanje parking prostorima. Vijećnici su potom jednoglasno usvojili Rješenje o imenovanju člana OIK-a Gračanica (u novi mandat od 7 godina izabran je Zoran Pavlović). Do kraja sjednice usvojena je informacija o stanju putne infrastrukture na području

općine Gračanica, te informacija o realizaciji projekta “Regionalna sanitarna deponija Do-boj”.

3. 12. 2015.

“Razvoj JP Vodovod i kanalizacija u proteklih 20 godina” – prezentacija uspjeha i dostignuća



(foto: bkc-gracanica.ba)

Razvoj JP “Vodovod i kanalizacija” Gračanica 1995.–2015. naslov je prezentacije koja je održana u ovom preduzeću. Hronologija događaja u proteklih 20 godina, razvoj vodosnabdjevanja i odvođenja otpadnih voda u proteklih 20 godina, smanjenje gubitaka i neobračunate vode, upravljanje imovinom i nova dostignuća u postizanju standarda uspješnosti bile su podteme današnje prezentacije. To je detaljnije obrađeno u publikaciji, čiji je autor dr. sc. Fuad Alić, direktor preduzeća, koja je poslužila kao podloga ove prezentacije. Ovom skupu prisustvovali su građani, vijećnici i ostali zainteresovani. Nakon održane prezentacije, prisutni su se uključili u aktivno učešće i razgovor sa predstavnicima Vodovoda i Kanalizacije, koji su spremno odgovorali na sva postavljena pitanja.

3. 12. 2015.

Gračanički glasnik: promocija četrdesetog jubilarnog broja.

O dvadesetogodišnjici izlaženja Časopisa, njegovom značaju za kulturnu historiju ovoga kraja, te dostignućima Časopisa u protekle dvije decenije na promociji je govorio

je književnik i publicist Zlatko Dukić, inače dugogodišnji suradnik ovog glasila. Ovim, 40. brojem, “Gračanički glasnik” obilježava svojevrsan jubilej: 40 brojeva i 20 godina izlaženja, što je kontinuitet sa kojom se malo koji časopis ovakvog profila u našoj zemlji danas može pohvaliti. Povodom tog jubileja Redakcija je najavila još nekoliko promocija i drugih manifestacija. Svoja razmišljanja i utiske istim povodom, u uvodu u ovaj broj Časopisa, objavljuje Amir Brka poznati BiH književnik i direktor Centra za kulturu i obrazovanje u Tešnju.

5. 12. 2015.

Umro inženjer Nezir Kapetančić

Bio je jedan od prvih diplomiranih mašinskih inženjera u Gračanici, koji je svoju stručnost, znanje, a prije svega istrajnost u rješavanju raznih tehničkih problema, na svoj način, dokazivao u praksi. Najplodnije godine svog života proveo je u gračaničkom “Feringu” kao vodeći inženjer u proizvodnji. Sedamdesetih godina prošlog stoljeća dao je poseban doprinos osvajanju proizvodnje i tržišta građevinskih toranjskih dizalica i drugih vrsta mosnih kranova, po čemu je “Fering” zauzimao lidersku poziciju u metalnoj industriji Bosne i Hercegovine, ravnopravno konkurirajući sličnim tadašnjim hrvatskim i slovenačkim firmama (“Metalna” npr.). Premda se u vrijeme socijalističke Jugoslavije nije puno zanimao za politiku, jer ga je u prvom redu interesovala proizvodnja, sticajem okolnosti, obnašao je jedan jednogodišnji mandat funkciju predsjednika Skupštine općine Gračanica (1982. – 1983. godine). Tokom rata za Bosnu i Hercegovinu (1992. – 1995.), svoje znanje i iskustvo stavio je u funkciju odbrane zemlje. Bio je osnivač i rukovodilac namjenske proizvodnje, koja je funkcionisala u bezbjednijim dijelovima općine kao jedan od ključnih faktora odbrane ovih prostora. Nakon rata bavio se poduzetništvom, između ostalog konstruisao je zanimljivu sušaru

šljiva, koja je izazvala zapažen interes na tržištu. Umro je u 72. godini života.

8. 12. 2015.

Osnivač i direktor gračaničke firme Eko line “Kovan” Said Karalić među pet “Najmenadžera decenije” za 2015.

Radi se o jednom od tradicionalnih priznanja, koja svake godine dodjeljuje Regionalna agencija za izbor i promociju najuspješnijih poslovnih ljudi i kompanija Bosne i Hercegovine, jugoistočne i srednje Europe, Europsko udruženje menadžera i časopis “Euromanager” u Banja Luci.. Između ostalih, prestižno priznanje **“Najmenadžer decenije”** za dugogodišnji rad, angažiranje i rezultate rada menadžera i njihovih kompanija ove godine ponijelo je pet dobitnika: Adnan Šteta i kompanija “Konzum BiH”, **Said Karalić i firma “Kovan” M.I. iz Gračanice**, Kemal Čolak i Tvornica montažnih kuća “Promo” iz Donjeg Vakufa, Safudin Čengić i kompanija “Centrotans Eurolines” Sarajevo i Valentin Ilievski i kompanija “Messer BH” Sarajevo.

18. 12. 2015.

Asfaltirana dionica na putu koji spaja mjesne zajednice Stjepan Polje i Malešiće



(foto: bkc-gracanica.ba)

Ukupna vrijednost projekta je 135.000 KM. Općina Gračanica je obezbijedila 115.000, dok su građani učestvovali sa 20.000 KM. Asfaltirana je dionica koja vodi do mezarja

Brezik, na izlazu iz Stjepan Polja u pravcu Zečeva Gaja, odnosno Malešića.

23. 12. 2015

Izbor sportiste godine Općine Gračanica za 2015.

Za najbolju sportistkinju proglašena je Amela Šerbečić, odbojkašica ŽOK “Fortex” Gračanica, a za najboljeg sportistu Husein Poturalić, nogometaš NK “Bratstvo”. Najuspješniji kolektivi su: NK “Lokomotiva” iz Miričine i ŽOK “Fortex” Gračanica; najuspješniji trener za ovu godinu je Ferik Dizdarević, trener kadetske selekcije NK “Bratstvo” dok je najuspješniji sportski radnik Emir Begović iz FK “Lokomotiva” Miričina. U juniorskoj kategoriji nagrade su osvojili Edina Hadžić, odbojkašica ŽOK “Fortex” Gračanice i Jasmin Avdić, rukometaš RK “Gračanica”. Najboljim kadetima proglašeni su: Belma Mujanović, članica KK “Gračanica” i Haris Mehičić, član NK “Bratstvo” Gračanica. Najbolji pioniri su Mubina Rešidbegović, članica KK “Gračanica” i Mirza Husićić član KK “Lavo-vi”. Posebna priznanja perspektivnim sportistima, koji su u 2015. godini ostvarili značajnije rezultate pripala su: Kerimu Bukviću – članu RK “Gračanica”, Amili Šuša, članici BK “Gračanica”, Dženani Džananović, članici Džudo kluba “Pribava” i Nadji Škapur, članici škole rukometa “First” Gračanica. Osnovna škola Donja Orahovica proglašena je školom sa najboljim sportskim rezultatima, a za najboljeg nastavnika u ovoj oblasti proglašen je Nermin Hodžić, nastavnik tjelesnog i zdravstvenog odgoja iz te škole. Priznanje za razvoj sporta na nivou Općine Gračanica u 2015. godini pripalo je Općinskom načelniku Nusretu Heliću. Posthumna priznanja za doprinos razvoju sporta u Gračanici uručena su porodicama Gec i Fišić u znak sjećanja na rahmetli Ekrema Geca, bivšeg igrača Bratstva i Hajrudina Fišića-Fišu, dugogodišnjeg sponzora gračaničkih sportskih kolektiva. Posebna priznanja uručena su i vlasniku

“Grafit” ateljea Safetu Begoviću, te bračnom paru Jahić, Hatidži i Fahrudinu.

29. 12. 2015.

Održana 37. sjednica Općinskog vijeća Gračanica: Budžet i programski dokumenti Općinskog vijeća i Općinskog načelnika, te povećanje naknade općinskim vijećnicima

Obim Općinskog budžeta za 2016. iznosi 12.752.066 KM, a sastoji se od prihoda i primitaka u iznosu od 11.407.180 KM, te prenesenog viška prihoda iz ranijeg perioda i procjene za 2015. godinu u iznosu od 1.344.886 KM. U odnosu na nacrt, usvojeni Budžet je veći za 2.649.066 KM ili 26,22 % . Povećana su uglavnom sredstva za kapitalne izdatke za 2.266.266 KM i tekući izdaci u vrijednosti od 382.800 KM. Obrazlažući ovaj Budžet, Općinski načelnik je obećao “da će lokalna vlast i dalje biti štedljiva, predana redu i radu.” Usvojena je i *Odluka o izvršavanju Budžeta, uz zaključak da predsjednici vijeća mjesnih zajednica do 31. 01. 2016. godine, dostave odluku o upravljanju vodovodima kako bi se realizovala planirana sredstva iz budžeta. Osim budžetskih, usvojene su još dvije odluke: o davanju saglasnosti na idejno rješenje uređenja zelene pijace u Gračanici i o izmjenama i dopunama odluke o visini naknade članovima općinskog vijeća i članovima radnih tijela koju je Vijeću predložio Kolegij općinskog vijeća. Odlukom o visini naknade, vijećnički paušali povećani su sa 300 na 500 KM, što je naišlo na osudu dijela javnosti. Nakon usvajanja te odluke, programski dokumenti Općinskog vijeća i načelnika prošli su bez rasprave.*

27. 01. 2016

U Gračanici po prvi put obilježen Međunarodni dan sjećanja na Holokaust

Na ulazu u gračanički Park žrtava genocida u Srebrenici osvanuli su neobični plakati



(foto: bkc-gracanica.ba)

u vidu osmrtnica, sa natpisom “Sjećanje na ubijene sugrađane” i imenima ukupno tridesetero ljudi, muškaraca, žena, djece i staraca – Gračanlija po rođenju i mjestu boravka, Jevreja po narodnosti, koji su ubijeni u Holokaustu, najstrašnijem i najmasovnijem zločinu genocida u historiji čovječanstva. Radilo se o uličnoj akciji koju su u povodu 27. januara, Međunarodnog dana sjećanja na Holokaust, organizirali članovi gradskog ogranka Asocijacije mladih SDA. Ovaj datum se, inače, obilježava na osnovu odluke Generalne skupštine UN-a, na datum oslobađanja zloglasnog nacističkog logora smrti Auschwitz. Tog dana u mnogim zemljama svijeta odaje se poštovanje žrtvama nacističkog genocida, ali i svih drugih genocida i zločina protiv čovječnosti u svijetu. Akcija je izazvala značajnu pažnju prolaznika, kao i učesnika na društvenim mrežama.

27. 01. 2016.

Irfan Horzović u Gračanici: književna večer u Omladinskom centru “Anea”

U ugodnom ambijentu Omladinskog centra “Anea”, organizatora večeri, o Horzovićevom stvaralaštvu govorili su mr. sc. Fatima Bećarević i prof. Jasmin Sarajlić, a naravno – i sam autor, koji je ispričao brojne epizode, događaje i anegdote iz svog životnog i radnog vijeka, od književnih početaka pa do danas. Riječ je o pripovjedaču, romansijeru, dramatičaru, esejisti i pjesniku, koji se sa uspjehom



(foto: udruženje Anea-MG)

okušao u skoro svakoj od glavnih književnih formi, ali je najveće domete ipak postigao u prozi: romanima, pripovijetkama i pričama, koje ga uvrštavaju u sami vrh savremene bosanskohercegovačke, pa i regionalne književnosti. Dobitnik je brojnih nagrada i priznanja, a djela su mu prevedena na više svjetskih jezika. Od brojnih djela ovoga pisca, čija bibliografija broji skoro četrdesetak naslova, najviše se, ipak, govorilo o knjizi priča “Talhe ili šedrvanski vrt”, te romanu “Imotski kadija”. Pri završetku programa u razgovor su se uključili i neki od posjetitelja.

28. 1. 2016.

Održana 38. sjednica Općinskog vijeća Gračanica: najviše rasprave o stanju bezbjednosti i planu kulturnih manifestacija na području općine Gračanica...

...dok je izvještaj o realizaciji Programa rada Općinskog vijeća Gračanica za prošlu godinu prošao takoreći bez rasprave (izuzimajući upućenu pohvalu od strane općinskog načelnika). Govorilo se i o Izvještaju o rješavanju upravnih stvari u upravnom postupku u službama za upravu Općine Gračanica u 2015. godini i zaključeno da se uputi inicijativa višim organima vlasti da pojednostave procedure izdavanja raznih dozvola i saglasnosti koje su propisane za dobijanje urbanističkih i građevinskih dozvola, što je do sada znatno usporavalo postupak dobijanja tih dozvola.

Osim toga, usvojena je Informacija o problematici javnog prevoza putnika u Općini Gračanica, dok je Informacija o planu kulturnih manifestacija u Općini Gračanica u 2016. godini, nakon opširnije rasprave, vraćena predlagачu na doradu.

12. – 20. 02. 2016.

Rekonstruisano nekoliko gradskih ulica



(foto: općina-gracanica.ba)

Relativno povoljni vremenski uslovi pogodovali su za izvođenje radova na rekonstrukciji i asfaltiranju nekoliko ulica i sokaka po Gračanici, koji su finansirani iz općinskog budžeta. Tako je 12. 02. 2016 godine asfaltirana Ulica Kotoruša u svojoj punoj širini i dužini od oko 180 metara. Prethodno je u toj ulici ugrađen kolektor kanalizacione mreže i razvedena ulična rasvjeta. Asfaltirane su i dionice u ulicama Hajdarevac (u dužini od oko 250 m) i Šenik kod “Olimpa” (u dužini od oko 205 m). Nakon izgradnje kolektora fekalne i oborinske kanalizacije u projektu “Rekonstrukcija i proširenje sistema za prikupljanje i odvođenje fekalnih i oborinskih voda za gradsko područje Gračanice LOT 2”, 23.02.2016. završeno je asfaltiranje i sanacija dijela Ulice Sarajevske i dijela Ulice 212. oslobodilačke brigade. Novi asfaltni sloj u te dvije ulice položen je u punoj njihovoj širini i ukupnoj dužini od oko 250 m.

29. 2. 2016.

Održana 39. sjednica Općinskog vijeća: u znaku prosvjete (upisi, stipendije...)

Pošto su jednoglasno usvojili Izvještaj o realizaciji programskih aktivnosti općinskog načelnika za 2015. godinu, nakon kraće rasprave, jednoglasno su usvojili, između ostalog i planove upisa učenika u Gračaničku gimnaziju i Mješovitnu srednju školu za 2016/17. školsku godinu. Na dnevnom redu bile su i informacije: o dodjeli stipendija učenicima srednjih škola i studentima za školsku 2015/2016. godinu i o stanju zaštite od požara i vatrogastva, praćenju i izvršenju plana zaštite od požara na području općine Gračanica u 2015. godini – koje su, takođe usvojene bez veće rasprave.

01. 03. 2016.

Obilježen Dan nezavisnosti Bosne i Hercegovine

U prijedodnevnom satima, uličnom akcijom (podjelom državnih zastava i prigodnih letaka) građanima su na značaj ovog datuma ukazali aktivisti Asocijacije mladih SDA, dok je službeni dio programa, u organizaciji Općine, uslijedio poslijepodne: odavanje pošte i polaganje cvijeća na spomen obilježja u centru grada, svečana akademija, na kojoj je govorio Edin Ibrišević, predsjedavajući Općinskog vijeća, dok su u kulturno-umjetničkom dijelu programa učestvovali nastavnici Muzičke škole Gračanica, te vokalni ansambl "Arabeske", uz recital glumca Irfana Kasumovića.

01. 03. 2016.

Klizalište u Gračanici: uspješno okončana sezona

Nakon više inicijativa od strane građana i općinskih vijećnika, u Gračanici je, na rukometnom igralištu, postavljeno klizalište za

djecu i mlade – pod pokroviteljstvom Općine, a u saradnji sa Sportskim savezom općine Gračanica i J. U. Bosanski kulturni centar. U toku mjesec dana rada (od 01. 02. do 01. 03., svakoga dana od 10.00 do 22.00 sati), posjetilo ga je skoro 8.500 učesnika. Opća ocjena za ovaj sportsko-zabavni sadržaj je pozitivna, te su se, s tim u vezi, čule i najave da se klizalište postavi i naredne godine.

06. 03. 2016.

Izgradnja nove džamije u Rašljevi – stara ostaje očuvana

Polaganjem temelja i učenjem prigodne dove, u Rašljevi je na svečan način označen početak izgradnje nove mjesne džamije. Svečanosti su prisustvovali glavni imam i predsjednik Medžlisa Islamske zajednice Gračanica, Smajo ef. Mustafić i dr. Admir Brkičević, predstavnici Medžlisa Srebrenik, te u ulozi domaćina imam džemata Rašljeva Ibrahim ef. Hadžiomerović, sa članovima džematskog i građevinskog odbora. Prisutan je bio i veći broj mještana, kao i gostiju iz drugih džemata. Džamija će se graditi na novoj lokaciji, u centru naselja, na zemljištu koje su uvakufili nasljednici Šanage Hadžiomerovića. Planirano je da radovi na izgradnji džamije traju do sredine ljeta 2016. godine, a sredstva će osigurati mještani uz pomoć donatora, od kojih su se neki već uključili u realizaciju projekta. Odborom za izgradnju džamije rukovodi umirovljeni general Fikret Muslimović, a izvođač radova je građevinska firma "Sagra d.o.o." iz Gračanice. Postojeća džamija, izgrađena davne 1934. godine, uprkos višestrukim obnovama i renoviranjima, vremenom je postala neuslovna za potrebe džematlija. No, kao do danas jedina sačuvana džamija s drvenom munarom na seoskom području oko Gračanice, ona je i svojevrsan kulturno-historijski spomenik, tako da je odluka mještana i džematlija Rašljeve da pored izgradnje nove sačuvaju i staru džamiju – za svaku pohvalu.

18. 03. 2016. Simboličnim performansom srušen “Zid diskriminacije”



foto: *bkc-gracanica.ba*

Nakon javne prezentacije, održane četiri dana ranije, projekt “ZID – Zajedno iznad diskriminacije”, u kome učestvuju učenici Mješovite srednje škole Gračanica i Gimnazije “Dr. Mustafa Kamarić”, doživio je svoj nastavak u ulici Alije Izetbegovića, simboličnim performansom rušenja “zida diskriminacije”. Na zidu su bile ispisane najčešće korištene i prisutne riječi vrijeđanja i diskriminacije koje se mogu čuti u ovdašnjim školama i u javnosti. Simboličnim rušenjem zida učenici su iskazali svoj stav prema ovom problemu, ali i spremnost za iskorak ka boljoj budućnosti, te školovanju i životu u zajedništvu, pod sloganom “rušimo zid, gradimo mir”. Inače, projekt “Zajedno iznad diskriminacije” realizira se u sedam lokalnih zajednica u Bosni i Hercegovini, u okviru njemačke fondacije “Schüler Helfen Leben” (SHL), koja djeluje u našoj zemlji već nekoliko godina – kroz programe neformalnog obrazovanja mladih, te podršku omladinskim projektima. Osim prezentacije i simboličnog “rušenja zida”, u okviru ovog projekta su predviđene i druge različite aktivnosti (projekcije filmova, snimanje dokumentarnih reportaža, sportske aktivnosti, veče srednjoškolaca...).

22. 03. 2016. U organizaciji JP “Vodovod i kanalizacija” obilježen Svjetski dan voda



foto: *bkc-gracanica.ba*

Svjetski dan voda, međunarodni praznik koji se obilježava širom svijeta još od 1993. godine, na osnovu posebne rezolucije Generalne skupštine UN-a, prigodnim je programom obilježen i u Gračanici. Za to se pobrinulo gračaničko javno preduzeće “Vodovod i kanalizacija”, u saradnji sa Radio Gračanicom i Ekološkom sekcijom Mješovite srednje škole. Radio Gračanica je upriličila specijalni otvoreni program. Pored reportaža sa terena, u studiju je gostovao i dr. sc. Fuad Alić, direktor “Vodovoda i kanalizacije”, a za slušatelje je priređen radio-kviz sa novčanim nagradama. Prigodan program je održan i u foajeu BKC-a, u kome je postavljena i izložba učeničkih radova. O značaju ovog svjetskog datuma govorio je prof. Šefik Hasić, voditelj Ekološke sekcije Mješovite srednje škole, obratili su se i predstavnici “Vodovoda i kanalizacije”, a potom su proglašeni pobjednici literarnog i likovnog konkursa za učenike osnovnih i srednjih škola na temu “Kruženje vode u prirodi – proces koji život znači”.

23. 3. 2016

Na Filozofskom fakultetu u Tuzli promovisan projekat “Gračanički glasnik”

U povodu dvadesete godišnjice utemeljenja i izlaska iz štampe 40. broja ovog časopisa u amfiteatru Filozofskog fakulteta u Tuzli obavljena je promocija i na najbolji način obilježen značajan jubilej tog velikog izdavačkog projekta Organizatori promocije bili su Arhiv Tuzlanskog kantona, Društvo arhivskih zaposlenika i Filozofski fakultet u Tuzli. Nakon kraćeg dokumentarnog filma, o projektu “Gračanički glasnik” (iskustva, rezultati, misija) govorili su prof. dr. Izet Šabotić, prof. dr. Kunić i dr.sc. Omer Hamzić, kao osnivač i glavni i odgovorni urednik Časopisa. Moderator skupa bio je mr.sc. Omer Zulić, direktor Arhiva TK. Promotori i učesnici skupa pohvalili su napore Redakcije i izdavača Časopisa – Izdavačke kuće “Monos” iz Gračanice, koji u ovim teškim godinama za kulturu uspješno istrajavaju na ovom projektu, čestitali im jubilej i zaželjeli još bolje rezultate u budućnosti.

31. 3. 2016.

Održana 40. sjednica Općinskog vijeća: usvojen izvještaj o izvršenju Budžeta i izvještaji o radu nekoliko javnih ustanova u 2015. godini

Bilo je govora i o izmjenama i dopunama odluke o općinskim priznanjima, rješavanju pitanja parking mjesta u gradu (privremenom upravljanju parking-automatima), te je doneseno više odluka u vezi sa utvrđivanjem konačne cijene kvadratnog metra korisne stambene površine, zatim visine naknade za pogodnost gradskog građevinskog zemljišta (rente), odluka o prodaji više nekretnina itd. Nakon donošenja navedenih odluka usvojeni su izvještaji o radu i finansijskom poslovanju sa bilansom stanja i računom prihoda i rashoda u 2015. godine za sljedeće javne ustanove:

Dječije obdanište “Naša djeca”, Centar za socijalni rad i Bosanski kulturni centar. Konačno usvojene su i dvije informacije: o radu Općinskog suda u Gračanici za 2015.godinu i o planu kulturnih manifestacija i javnih događaja na području općine Gračanica za 2016.godinu (koja je doručena po zaključku Vijeća sa prethodne sjednice).

01. 04. 2016.

Donacija gračaničkoj biblioteci za Međunarodni dan dječije knjige



(foto: bkc-gracanica.ba)

U povodu 2. aprila, Međunarodnog dana dječije knjige, Gradski odbor Asocijacije mladih SDA Gračanica organizirao je prikupljanje sredstava za nabavku dječijih knjiga za Narodnu biblioteku “dr.Mustafa Kamarić” Gračanica. Imajući u vidu da je knjižni fond ove biblioteke dosta deficitaran, posebno kada su knjige za djecu u pitanju, mladi su odlučili da na simboličan način pomognu njegovu obnovu. Tom prilikom je kupljen veći broj naslova namjenjenih najmlađim čitateljima i početnicima, koji je uručen gradskoj biblioteci.

04. 04. 2016.

Nastavak uređenja i sanacije gračaničkih ulica: Malkića sokak

Riječ je o ulici koja se pruža od ulice Gornji Čiriš do ulice Čiriš, dužine 95 m, koja je nekoliko prethodnih godina bila u veoma lošem, skoro neprohodnom stanju – na veliko nezadovoljstvo stanovnika. Prije asfaltiranja,

u toj ulici rekonstruisana je postojeće fekalna i izgrađena oborinska kanalizacija u dužini od 165 m. Ukupna vrijednost radova je iznosila blizu 53.000 KM.

07. 04. 2016.

Obilježavanje Dana oslobođenja Gračanice u Drugom svjetskom ratu – otvorena izložba tradicionalne arhitekture “Kuća sjeveroistočne Bosne” u foaju BKC

Prije otvaranja izložbe, izvršeno je polaganje cvijeća na spomen-obilježja u gradu, a potom održana svečana akademija na kojoj je referat posvećen tom datumu pročitao općinski načelnik Nusret Helić. Nakon pročitano referata, učenici i nastavnici Muzičke škole u Gračanici izveli su prigodan muzički program. Po završetku svečane akademije, svečano je otvorena izložba “*Kuća sjeveroistočne Bosne*”, posvećena tradicionalnoj stambenoj arhitekturi na području Tuzlanskog kantona. Izložbu je organizirao Zavod za zaštitu i korištenje kulturno-historijskog i prirodnog naslijeđa Tuzlanskog kantona u saradnji sa Bosanskim kulturnim centrom Gračanica. Autorica izložbe je dipl. ing. arhitekture Tijana Veljković, a ista je do sada gostovala u nekoliko gradova Tuzlanskog kantona i šire regije. O značaju izložbe na otvorenju je govorio prof. dr. Mirsad Kunić sa Filozofskog fakulteta u Tuzli, a izložbu je službeno otvorio direktor Zavoda Benjamin Bajraktarević.

08. 04. 2014.

Massimo u Gračanici – koncert za pamćenje

Massimo Savić, jedan od najosobnijih glazbenika i najupečatljivijih vokala na prostoru šire regije, u okviru je svoje bosansko-hercegovačke turneje – uz Sarajevo, Mostar, Zenicu i Bihać – održao koncert i u Gračanici. Najava ovog događaja izazvala je veliku pažnju, u Gračanici, ali i široj okolini, tako



(foto: Demir Hotić)

da su ulaznice bile rasprodane skoro mjesec dana prije samoga koncerta, te je i velika sala BKC-a bila ispunjena do posljednjeg mjesta. Predstavljajući svoj novi album, u dva sata odlične zabave, ovaj je umjetnik sa pratećim bendom stvorio ugođaj za pamćenje, a sjajnoj atmosferi je doprinijela i publika. Pohvale idu i upravi Bosanskog kulturnog centra, koja je koncert organizirala, što je krupan iskorak za našu sredinu koju mnogi nazivaju i kulturnom provincijom.

09. 04. 2016.

Srebro za gračaničke srednjoškolce na Naučnoj olimpijadi u Sarajevu

Sajam naučnih projekata za učenike srednjih škola iz cijele Bosne i Hercegovine, pod nazivom “Bosnian Science Olympiad”, najveće je srednjoškolsko takmičenje iz oblasti nauke u našoj zemlji, kojeg već tradicionalno organizira Međunarodni univerzitet Burch – ove godine u partnerstvu sa Ambasadom Sjedinjenih Američkih Država, te Fondacijom “Izvor nade”. Na sajmu se predstavilo više od 200 srednjoškolaca, prezentirajući projekte u četiri različite kategorije. Gračanicu je pred-



(foto: bkc-gracanica.ba)

stavljalo dvoje učenika Mješovite srednje škole: Kerim Grbić i Alisa Hadžić, uz pratnju prof. Samera Fazlića kao supervizora. Predstavili su se sa projektom proizvodnje biogoriva iz algi pod nazivom “*Fresh air we share, biofuels show we care*”, prezentirajući rezultate ekeperimenata koje su u prethodnih nekoliko mjeseci s uspjehom izveli, uspjevši da hemijskim postupcima iz zasada algi, u laboratorijskim uvjetima, uspješno dobiju biodizel. U Gračanicu su se vratili sa dvije osvojene nagrade: za drugo mjesto u kategoriji “Okoliš”, te za najbolju motivacionu poruku sajma. Oboje učenika su kao nagradu osvojili 75% stipendije za školovanje na Burch univerzitetu, te 50% stipendije za stanovanje u studentskom domu “Izvor nade” (u ukupnoj vrijednosti od 17.000 KM). S obzirom na izuzetno jaku konkurenciju i velik broj kvalitetnih projekata prezentiranih na “Olimpijadi” – radi se o sjajnom rezultatu i velikom uspjehu ovo dvoje učesnika, kao i škole iz koje dolaze.

16. 04. 2016.

Omladinska radna akcija – čišćenje izletišta na Gaju

U okviru tradicionalne akcije “April – mjesec čistoće”, na inicijativu Ekološkog udruženja “Eko lideri” i nekoliko omladinskih organizacija i grupa, te u saradnji sa vijećima učenika gračaničkih srednjih škola, organizirana je radna akcija “ORA 2016.”, po uzoru na ne-



kadašnje omladinske radne akcije. Mladi su uredili širi lokalitet nekadašnjeg gračaničkog izletišta Gaj, očistili prostor neposredno pored ruševina u požaru stradalog Doma izviđača, zgrade čija je sudbina, nažalost, i danas neizvjesna. Time su na simboličan način istaknuli potrebu aktivnijeg djelovanja i društvenog angažmana mladih, u korist lokalne zajednice i društva u cjelini.

19.-22. 04. 2016.

Održan Međunarodni sajam poduzetništva i obrta “GRAPOS-EXPO 2016.”



(foto: opcina-gracanica.ba)

Po sedmi put, Gračanica je bila domaćin Međunarodnog sajma poduzetništva i obrta “Grapos-Expo”. Otvaranju Sajma prisustvovalo je više zvanica i visokih gostiju iz svijeta politike, diplomatije i privrede. Među njima su bili i federalni premijer Fadil Novalić, te

kantonalni premijer Bego Gutić, kojima je, uz načelnika općine Gračanica Nusreta Helića, pripala čast da presijeku vrpcu i označe početak sajamskih aktivnosti. Drugog dana sajam je posjetio i Visoki predstavnik Međunarodne zajednice u BiH, Valentin Inzko. Na ovogodišnjem sajmu, na 120 štandova, smještenih na 6.000 m² otvorenog i 4.000 m² zatvorenog prostora, izlagalo je 315 izlagača iz Bosne i Hercegovine i inozemstva. U okviru sajma, kako je to uobičajeno, održano je i više stručnih izlaganja, prezentacija, radionica, konferencija i okruglih stolova, a zapažena je, po prvi put, inicijativa da se dio edukativnih, kulturnih i zabavnih sadržaja prenese i izvan sajamskog kruga, u sam grad. Tako je drugog dana Sajma, u velikoj sali Bosanskog kulturnog centra održana interaktivna radionica i predavanje pod nazivom "Intelektualni dernek", na kome se predstavio prof. dr. Kasim Tatić, šef katedre za mikroekonomiju na Ekonomskom fakultetu u Sarajevu i jedan od vodećih i najpopularnijih predavača iz oblasti ekonomskih nauka u našoj zemlji. Trećeg dana Sajma, u centru grada održan je muzički koncert – veće muzike Đorđa Balaševića, na kome je nastupio "(Ne) normalni Balašević Tribute Band" iz Novog Sada, dok je četvrtog dana (22. 04.) u velikoj sali Bosanskog kulturnog centra izvedena čuvena "Đurologija", stand-up komedija Branka Đurića Đure, inače jedna od najpopularnijih pozorišnih izvedbi širom Bosne i Hercegovine i susjednih zemalja.

28. 4. 2016.

Održana 41. sjednica Općinskog vijeća: utvrđene plaće općinskih službenika, usvojeni izvještaji JU Dom zdravlja, Gradska apoteka i veterinarska stanica...

... Nacrt odluke o dodjeli općinskih priznanja, odluka o prodaji nekih općinskih nekretnina, izvještaj o higijensko-epidemiološkoj situaciji na opštini... Veću pažnju vijećnika pobudio je, kao i obično Izvještaj o izvršenju budžeta

općine Gračanica za prvi kvartal 2016. godine. Kako je objavljeno na službenom portalu Općine Gračanica, ukupno ostvareni prihodi u tom periodu iznose 3.378.062 KM i veći su u odnosu na plan za 11,8 %. Veće ostvarenje je na ne poreznim prihodima za 21 % i grantovima za 59 %, dok je slabije ostvarenje na poreznim prihodima za 6,5 %, od čega su indirektni porezi ostvareni manji za 14 %, uz obrazloženje da su prihodi i ostvarenje nestabilni i ne ostvaruju se po dinamici kako se očekuje. Izdaci su ostvareni u iznosu od 2.766.659 KM i u odnosu na plan su manji za 18 %, uz obrazloženje da se u ovom periodu ne ostvaruju planirani izdaci, posebno kapitalni, jer se tenderi tek raspisuju i provode procedure.

05./06. 05. 2016.

Sajam učeničkih proizvoda u osnovnoj školi "Hasan Kikić": sakupljeno preko 11.500 KM za školsku sportsku salu

Na dvodnevnom sajmu učenici su kroz simboličnu prodaju vlastitih proizvoda, radova i izradevina ostvarili prihod od 11.751,00 KM, koji je potom usmjeren u rekonstrukciju sportske sale ove škole. Sajam je organizirala uprava škole u saradnji sa Vijećem roditelja, te Vijećem učenika, a pored učenika i nastavnika, na sajmu su sa vlastitim proizvodima učestvovali i lokalni proizvođači zdrave hrane (firme "Jukan", "Slatka varoš" i "Gakom"). Sajmu su prisustvovali i predstavnici vlasti: kantonalni premijer Bego Gutić, sa ministrima Danijelom Simić, Hasanom Fehratovićem i Zlatanom Muratovićem, kao i načelnik općine Gračanica Nusret Helić. I premijer i načelnik su obećali izdvojiti po 40.000 KM za navedeni projekt, za koga je uprava škole, uz pomoć gračaničkih privrednika i roditelja, već osigurala 70.000 KM. Zahvaljući svemu tome, učenici škole – ali i brojni građani, koji navedeni objekt koriste u sportske i rekreativne svrhe – uskoro će aktivnosti obavljati u rekonstruiranoj, uređenoj i "podmlađenoj" školskoj sali.